

CONVENIO DE COLABORACIÓN ENTRE O INSTITUTO GALEGO DO CONSUMO E DA COMPETENCIA E CÁRITAS DIOCESANA DE LUGO PARA O DESENVOLVEMENTO DE TALLERES DE FORMACIÓN NO PROGRAMA CONSUMO RESPONDE

En Santiago de Compostela, de xullo de 2024

REUNIDOS

Dunha parte, Gabriel Alén Castro, director do Instituto Galego do Consumo e da Competencia (en adiante IGCC), nomeado polo Decreto 192/2020, do 20 de novembro (DOG núm. 236, do 23 de novembro de 2020), actuando en nome e representación do IGCC, en virtude das facultades que lle confire o artigo 13 dos Estatutos do IGCC publicados mediante Decreto 118/2016, do 4 de agosto, polo que se crea o Instituto Galego do Consumo e da Competencia (DOG nº 160 do 25 de agosto de 2016), e o artigo 1 da Resolución do 23 de marzo de 2017 sobre delegación de competencias en diversos órganos deste instituto (DOG nº 74 do 18 de abril de 2017);

E doutra, María Amparo González Méndez, con NIF 34994140P, directora e representante legal de Cáritas Diocesana de Lugo (en adiante Cáritas), domiciliada en Rúa Luis Peña Novo 6 de Lugo, con NIF R2701016D, facendo uso das facultades que lle foron outorgadas por medio da escritura pública de poder autorizada a 15 de junio de 2023 polo notario do Ilustre Colexio de Galicia, Montserrat Trigo Mayor, baixo o número 972 do seu protocolo.

Ambas as dúas partes teñen, segundo interveñen, a capacidade legal necesaria para formalizar o seguinte **convenio de colaboración**, e



EXPOÑEN

Primeiro.- O IGCC é un organismo autónomo de carácter administrativo e unha entidade de dereito público con personalidade xurídica propia, que actúa con plena autonomía funcional para o cumprimento dos seus fins.

Segundo.- De conformidade co disposto no artigo 4.1 k) do Decreto 118/2016, do 4 de agosto, polo que se crea o IGCC, e na disposición adicional segunda da Lei /2012, do 28 de marzo, galega de protección xeral das persoas consumidoras e usuarias, corresponde ao IGCC o exercicio das competencias que en materia de consumo ten atribuídas a Comunidade Autónoma de Galicia no artigo 30. Un. Catro da Lei 1/1981. Do 6 de abril de Estatuto de autonomía de Galicia.

En particular lle compete, segundo o artigo 49 d) da Lei 2/2012, a elaboración de plans e programas de actuación, en especial a través de novas tecnoloxías, conducentes á formación directa dirixida a todas as colectividades interesadas e, de modo especial, aos colectivos definidos como de protección especial.

E o artigo 50.1 da mesma habilita ao IGCC para establecer a colaboración coas entidades públicas e privadas autonómicas, estatais, comunitarias e internacionais, á hora de levar a cabo os diferentes plans e programas formativos e educativos en materia de consumo.

Terceiro.- A estratexia de protección ás persoas consumidoras para o período 2020/2025, ten por obxecto acadar un alto nivel de protección na nosa Comunidade Autónoma enmarcándose na "*Nova Axenda Europea do Consumidor 2020-2025*"; e neste senso, coloca no centro das súas políticas e medidas a protección das persoas consumidoras que, por encontrarse nunha situación de vulnerabilidade, non podan adoptar unha decisión acorde cos seus intereses.



Así, dentro do ámbito de persoas consumidoras vulnerables contéplase a realización dun plan formativo para colectivos vulnerables e diferentes programas entre os que se atopa o denominado Consumo Responde, que se dirixe, entre outras, a persoas con discapacidade e en situación de pobreza ou exclusión social.

Cuarto. – Cáritas diocesana é o organismo oficial da Igrexa nas diocese de Lugo para servir á acción caritativa e social, promovendo, coordinando e instrumentando a Comunicación Cristiá de Bens entre as comunidades eclesiais en todas as súas formas, axudando á promoción humana e ao desenvolvemento integral das persoas, grupos e comunidades, colaborando en aquelas accións que teñan este fin.

Quinto.– Segundo o artigo 1 dos Estatutos reguladores de Cáritas de Lugo son fins da organización, entre outros, concienciar e sensibilizar á comunidade cristiá e á sociedade en xeral en relación á caridade e á xustiza, así como promover, animar e coordinar iniciativas de carácter asistencial e promoción integral da persoa.

Así mesmo recóllese como un dos fins específicos manter o contacto e a colaboración coa Confederación de Cáritas Española e outras Cáritas diocesanas, especialmente as das dioceses de Galicia, así como con outras entidades benéficas e cos organismos civís que fora preciso, de ámbito nacional, autonómico, provincial ou municipal, que contribúan á consecución dos seus fins propios.

Sexto. -Ambas as partes consideran de mutuo interese para o cumprimento das súas respectivas funcións e fins establecer fórmulas de colaboración no ámbito formativo e divulgador a través deste convenio, realizando de forma conxunta actuacións formativas sobre consumo responsable dirixidas especificamente ás persoas en situación de vulnerabilidade ou risco de exclusión social, así como ás persoas ou entidades colaboradoras con Cáritas.

En virtude do exposto e recoñecéndose ambas as partes na representación que ostentan capacidade suficiente, acordan asinar un convenio de colaboración de acordo coas seguintes



CLÁUSULAS

Primeira.- Obxecto

O obxecto do convenio é establecer a forma e condicións nas que se desenvolverá a colaboración entre el IGCC e Cáritas Diocesana de Lugo para a realización conxunta de actividades de carácter formativo e divulgador en materia de consumo, de interese para os colectivos máis vulnerables.

Especialmente, en temas tan importantes como o sobreendebedamento e os servizos que cobren necesidades básicas como a luz, o gas, telefonía, ...

Segunda.- Actuacións formativas

Realizarase a formación de formadores (entidades e persoas colaboradoras, técnicos e persoal de CARITAS) e a realización de talleres sobre diferentes temáticas de consumo responsable. Todo isto co obxectivo de difundir as prácticas de consumo responsables entre os distintos colectivos que Cáritas acompaña, mediante a impartición por parte do IGCC de talleres sobre diferentes temáticas de consumo responsable de interese para os colectivos de persoas máis vulnerables, que se impartirían nas modalidades: telepresencial (mediante a propia plataforma de teleformación do IGCC) e/ou presencial nas instalacións que propoña Cáritas.

Terceira.- Temática dos talleres

As temáticas a tratar nos talleres serán as acordadas entre ambas as partes de entre as de maior interese, atendendo ao colectivo de persoas ao que van destinadas, como poden ser: os dereitos básicos das persoas consumidoras, os servizos financeiros, os servizos de luz e gas, telefonía...



Cuarta.- Horario

Os talleres realizaranse en horario de mañá e/ou tarde, segundo se acorde con Cáritas e sería unha formación mínima de 3 horas, adaptándoa ás súas entidades colaboradoras, técnicos, persoal de atención primaria e persoas usuarias.

Os talleres poden realizarse nunha xornada de 3 horas ou ben en xornadas diferentes dunha hora cada unha, segundo as necesidades de Cáritas.

Quinta.- Persoas destinatarias

A formación en consumo está destinada a entidades colaboradoras, técnicos, persoal de atención primaria e persoas usuarias de Cáritas, non sendo preciso un número mínimo de asistentes para impartir a formación.

Sexta.- Obrigas do IGCC

O IGCC obrígase a:

- 1º.- Diseñar e elaborar os contidos dos talleres e a formación de formadores.
- 2º.- Executar dita formación.
- 3º.- Realizar calquera outra actuación que sexa considerada de interese común para ambas as partes en relación coa actividade obxecto do convenio.

Setima.- Obrigas de Cáritas

Cáritas Diocesana de Lugo obrígase a:

- 1º.- Difundir e xestionar os talleres e a formación de formadores que se impartan, así como os talleres destinados a persoas usuarias.



2º.- Incluir no seu portal Web dos contidos, actividades e recursos, que debe converterse en punto de referencia na aprendizaxe sobre o consumo responsable e eficiente para as persoas máis vulnerables, centros e entidades relacionadas.

3º.- Realizar unha presentación oficial para todas as súas entidades colaboradoras, técnicos, persoal de atención primaria e persoas usuarias.

Oitava.- Financiamento

As actuacións previstas no presente convenio non xerarán custos nin darán lugar a contra prestación financeira entre as partes, e polo tanto, non precisan consignación orzamentaria.

Novena.- Comisión de seguimento

Para a valoración global do grao de cumprimento do convenio créase unha comisión paritaria de seguimento, formada por dous representantes de cada entidade, sendo presidida por un dos representantes do IGCC.

A actuación da comisión de seguimento axustarase ao establecido no artigo 15 e seguintes da Lei 40/2015, do 1 de outubro, de réxime xurídico do sector público, en canto teñan a consideración de básicos, e nos artigos 14 e seguintes da Lei 16/2010, de 17 de decembro, de organización e funcionamento da administración xeral e do sector público autonómico de Galicia.

A comisión deberá reunirse, como mínimo, unha vez ao ano e sempre que llo solicite unha das dúas partes.

Está comisión será competente para resolver os problemas que poidan suscitarse en canto á interpretación e cumprimento do convenio así como para realizar a coordinación técnica dos talleres.



Décima.- Causas de resolución do convenio

Son causas de resolución do presente convenio: o transcurso do prazo de vixencia do convenio sen acordar a súa prórroga, o acordo unánime de todos os asinantes, o incumprimento das obrigas e compromisos asumidos por parte dalgún dos asinantes, por decisión xudicial declaratoria da nulidade do convenio ou por calquera outra causa distinta das anteriores previstas na lei.

Décimo primeira.- Non existencia de relación laboral

A subscrición deste convenio non implicará relación laboral, contractual ou de calquera outro tipo entre as persoas que realicen os talleres deste convenio e o IGCC.

Décimo segunda.- Confidencialidade

As partes deberán respectar fronte a todas as persoas non directamente intervinientes e terceiros en xeral, unha confidencialidade estrita e rigorosa respecto a toda información, documentación e modalidades concretas de implementación de proxectos á que se teña acceso en virtude da execución do convenio, adoptando as medidas para que o persoal vinculado directa o indirectamente ao seu cumprimento tome as medidas necesarios a tal finalidade.

Décimo cuarta.- Protección de datos

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/2007, do 21 de decembro, polo que se aproba o Regulamento de desenvolvemento da Lei Orgánica de Protección de Datos, e demais normativa vixente de aplicación en cada momento en materia de protección de datos.



Así, de acordo coa Lei orgánica 3/2018, do 5 de decembro, de protección de datos persoais e garantía dos dereitos dixitais, as partes comprométense a non utilizar tales datos de carácter persoal con finalidade distinta á da execución do presente convenio, a non cedelos nin comunicalos baixo ningún concepto, e en especial a non reproducir, publicar ou difundir ningunha información acerca deles.

Cada parte responderá dos incumprimentos da normativa de protección de datos de carácter persoal nos que incorra.

Décimo quinta.- Publicidade e inscrición en rexistros.

O convenio será obxecto de publicidade e inscrición de conformidade co disposto no artigo 15 da Lei/12016, do 18 de xaneiro, de Transparencia e Bo Goberno e o Decreto 1126/2006, do 20 de xullo, polo que se regula o Rexistro de Convenios da Xunta de Galicia.

As partes asinantes consenten na publicación dos datos persoais e o resto das especificacións contidas no mesmo no Portal de Transparencia e Goberno Aberto.

Décimo sexta. -Natureza, réxime xurídico e xurisdición competente.

O presente convenio de colaboración ten natureza administrativa. Rexerase polas súas propias cláusulas e, para o non previsto nelas, polos artigos 47 e seguintes da Lei 40/2015, do 1 de outubro, do réxime xurídico do sector público, polo Acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e colaboración con particulares, publicado por resolución da Consellería de Economía e Facenda do 8 de abril de 1991; pola Lei 1/2016, do 18 de xaneiro, de transparencia e bo goberno; polo Decreto 126/2006, do 20 de xullo, polo que se regula o rexistro de convenios da Xunta de Galicia e pola demais normativa de aplicación.

De conformidade coa Lei 29/1998, do 13 de xullo, reguladora da Xurisdición Contencioso-administrativa, as cuestións litixiosas que poidan xurdir na





interpretación ou no incumprimento das obrigas que se deriven do convenio resolveranse na vía xurisdiccional contencioso-administrativa.

Décimo sexta.- Vixencia

O período de vixencia do presente convenio comezará o día da súa sinatura e estenderase ata o 31 de decembro de 2024. Todo isto sen prexuízo da posibilidade, en calquera momento antes da finalización do prazo previsto, de que os asinantes do convenio acorden unanimemente a súa prórroga por un período de ata catro anos adicionais ou a súa extinción.

Este convenio de colaboración obriga ao cumprimento do expresamente pactado, someténdose todas as partes ao acordado en todas as súas estipulacións, e como proba de conformidade subscríbese, por duplicado exemplar, en lugar e data arriba indicados

Asinado de maneira electrónica

O director do Instituto Galego do Consumo e
da Competencia

A directora de Cáritas Diocesana de Lugo

Gabriel Alén Castro

M^a Amparo González Méndez

